



## Scéim Caipitil Ceoil 2022

### Treoirínite maidir le Dámhachtain 1 (Grúpaí taibhiúcháin neamghairmiúla)

Arna bhainistiú ag Music Network, arna mhaoiniú ag an Roinn Turasóireachta, Cultúir, Ealaíon, Gaeltachta, Spóirt agus Meán.

Leagtar amach Scéim Caipitil Ceoil de chuid Music Network chun tacaíocht a chur ar fáil i ndáil le huirlisí ceoil a cheannach agus chun aghaidh a thabhairt ar réimse leathan riachtanas caipitil laistigh d'earnáil an cheoil in Éirinn.

Déantar cur síos sa doiciméad seo de **Scéim Caipitil Ceoil 2022 - Dámhachtain 1 (Grúpaí taibhiúcháin neamghairmiúla)**, tugtar faisnéis ann ar mar is féidir iarratas a dhéanamh, agus déantar achoimre ann ar mar a dhéanfar iarratais a mheas. Is é is aidhm leis an dámhachtain seo ná tacú le heagraíochtaí a bhfuil baint acu le taibhiú neamghairmiúil ceoil chun uirlisí a cheannach, a chothabháil agus/nó a dheisiú. Tá sé oscailte go díreach do ghrúpaí taibhiúcháin/buíonta ceoil neamghairmiúla in aon seánra ar bith. Tá sé oscailte freisin d'eagraíochtaí pobail, óige agus acmhainní a dhéanann maoirseacht ar thaibhithe ceoil san earnáil neamghairmiúil. N.B. Ní mór go mbainfeadh iarratais le huirlisí a mbeidh ceoltóirí neamghairmiúla agus iad sin amháin ag seinm orthu, agus ní mór na huirlisí sin a úsáid chun críocha cleachtaidh/teagaisc agus taibhithe.

#### Tosaíochtaí Dhámhachtain 1

- Tabharfar tús áite sa Scéim Caipitil Ceoil 2022 - Dámhachtain 1 d'iarratais ó eagraíochtaí ar féidir a léiriú go mbíonn rannpháirtithe 65 bliain d'aois nó níos sine bainteach leis na gníomhaíochtaí ceoil a reáchtálann siad.
- Tabharfar tús áite sa Scéim Caipitil Ceoil 2022 - Dámhachtain 1 d'iarratais ó eagraíochtaí ar féidir a léiriú go mbíonn daoine faoi mhíchumas rannpháirteach sna gníomhaíochtaí ceoil a reáchtálann siad. Féach láithreán gréasáin an Údaráis Náisiúnta Míchumais chun tuilleadh eolais a fháil: <http://nda.ie/disability/overview/definitions/>

Is é €170,000 an maoiniú iomlán a bheidh ar fáil de Scéim Caipitil Ceoil 2022 - Dámhachtain 1.

Is é 2pm, Dé Máirt an 28 Feabhra 2023 an dáta deiridh a nglacfar le hiarratais.

**Cé atá incháilithe le hiarratas a dhéanamh?**

Bannaí práis, feaga nó airgid	Grúpaí ceoil chlasaiceigh
Bannaí ceolchoirme	Cnagbhannaí nó bannaí samba
Ceolfhoirne agus buíonta amaitéaraí nó óige	Grúpaí ceoil pobail
Bannaí píob	Grúpaí popcheoil/rac-cheoil
Grúpaí snagcheoil	Grúpaí/eagraíochtaí ceoil thraidisiúnta
Cumainn ceoldrámaí	Cóir
Bunscoileanna/meánscoileanna, sa chás go mbaimeann iarratais le gníomhaíochtaí nach cuid den bhunchuraclam iad	
Ionaid/eagraíochtaí acmhainní/grúpaí pobail/grúpaí óige/scoileanna ceoil/gníomhaireachtaí eile thar ceann clár seanbhunaithe taibhiúcháin ceoil neamhghairmiúla.	

Tá Music Network tiomanta do chothromas agus d'ionchuimsiú, agus fáiltíonn sé roimh iarratais ó ghrúpaí i bpobail atá éagsúil ó thaobh cultúir de agus ó dhaoine faoi mhíchumas.

**Iarratasóirí / iarratais neamh-incháilithe**

- Níl Comhpháirtíochtaí Oideachais Ceoil Áitiúla atá maoinithe ag Music Generation go díreach incháilithe le hiarratas a dhéanamh. É sin ráite, fáiltítear roimh iarratais ó sholáthóirí oideachais ceoil áitiúla beag beann ar naisc ar bith le Clár Music Generation de chuid Comhpháirtíochtaí Oideachais Ceoil Áitiúla.
- Níl cuideachtaí brabúsacha incháilithe le hiarratas a dhéanamh.
- Níl daoine aonair incháilithe le hiarratas a dhéanamh.
- Níl eagraíochtaí atá lonnaithe lasmuigh de Phoblacht na hÉireann incháilithe le hiarratas a dhéanamh.
- Níl iar-dhámhachtaithe na Scéime Caipitil Ceoil nár chomhlíon coinníollacha a ndámhachtana incháilithe le hiarratas a dhéanamh.

Measfar d'iarratas a bheith neamh-incháilithe sa chás:

- go bhfaighfí d'iarratas i ndiaidh an dáta agus an ama deiridh a nglacfar le hiarratais: **2pm, Dé Máirt an 28 Feabhra 2023.**
- nach mbeadh na hÁbhair Tacaíochta Riachtanacha ar fad (leathanach 3 - 4) curtha ar aghaidh le d'iarratas.
- nach mbeadh d'iarratas ag teacht le coinníollacha na dámhachtana (leathanach 6 - 7).
- go mbainfeadh d'iarratas le huirlisí a ceannaíodh cheana féin nó a cheannófaí sula ndéanfaí cinntí i dtaca le maoiniú.
- nach mbeadh an fhoirm iarratais comhlánaithe ina hiomláine. Cuir isteach N/B ('ní bhaineann le hábhar') in aon chuid nach bhfuil ábhartha do d'iarratas, más gá.

Tabhair ar aird go ndícháileofar iarratais de thoradh stocaireachta.

**Caiteachas incháilithe / neamh-incháilithe**

Mar aon leis an gcostas a bhaineann le huirlisí ceoil (uirlisí nua nó uirlisí dara láimhe ar ardchaighdeán) a cheannach, is ionann na míreanna seo a leanas agus caiteachas **incháilithe** mar chuid Scéim Caipitil Ceoil 2022 - Dámhachtain 1:

Boghanna, sreanga, roisín, tacaí gualainne	Cásanna d'uirlisí	Maothadóirí
Drumacheann, bataí druma, scuaba	Seoláin uirlisí	Córais Fógartha Poiblí
Troitheán éifeachtaí	Seastáin uirlisí	Feagacha
Trealamh leictreafhuaimne	Micreafóin	Sain-Stólta, nuair is gá
Aimplitheoirí uirlise	Béalóga	Strapaí

Tá na míreanna seo a leanas **neamh-incháilithe** le haghaidh tacaíochta sa Scéim Caipitil Ceoil 2022 - Dámhachtain 1

Ardúigh Cóir	Seastáin cheoil, bileoga ceoil
Árachas/baránta d'uirlisí	Trealamh taifeadta
Ríomhairí/ríomhairí glúine	Spás cleachtaidh a cheannach/a fháil ar cíós
Méadranóim, tiúnóirí, táillí do tiúnáil	Éidí
Speansais (e.g. costais iompair, costais seachadta, táillí iompórtála, árachas/baránta) a bhaineann le uirlis/uirlisí a cheannach	

**An Próiseas Iarratais**

Ní mór d'iarratasóirí foirm iarratais ar líne a chomhlánú mar aon le hÁbhair Tacaíochta Riachtanacha a chur ar aghaidh. Féadfaidh iarratasóirí Ábhair Tacaíochta Roghnacha a chur ar aghaidh chomh maith.

**1. An Fhoirm Iarratais**

Tá sé chuid san fhoirm iarratais, ina n-iarrfar ar an iarratasóirí faisnéis a chur ar fáil maidir le sonraí teagmhála na heagraíochta / na n-ionadaithe, cúlra na heagraíochta (e.g. rialachas, maoiniúchán, comhaltaí / rannpháirtithe, gníomhaíochtaí), pleananna don todhchaí (e.g. gníomhaíochtaí atá ag teacht aníos, pleananna i leith forbartha) agus na huirlisí atá beartaithe lena gceannach (an costas, ranníocaíocht na heagraíochta i dtreo an chostais, faisnéis i dtaobh an gá a bhaineann leis na huirlisí atá beartaithe lena gceannach). Déanfar na hÁbhair Tacaíochta go léir a uaslódáil mar chuid den fhoirm iarratais ar líne a chur i gcrích.

**2. Ábhair Tacaíochta Riachtanacha**

Cinntigh go gcuirfidh tú gach ábhar a shonraítear thíos ar fáil, mar nach mbeifear in ann iarratais nach bhfuil na hÁbhair Tacaíochta Riachtanacha go léir san áireamh leo a mheas ina n-iomláine agus measfar iad a bheith neamh-incháilithe dá bhrí sin.

- Stair na heagraíochta

Doiciméad ina dtugtar eolas faoi fhorbairt na heagraíochta ó bunaíodh í. I gcás bunscoile / meánscoile, féadfaidh tú díriú go sonrath ar fhorbairt an chláir ceoil Moltar d'eagraíochtaí níos nua pleananna mionsonraithe forbartha a chur ar aghaidh in éineacht le stair na heagraíochta. (uasteorainn 1,000 focal).

- Liosta de chomhaltaí an bhoird/an choiste

Liosta de chomhaltaí bhord stiúrthóirí d'eagraíochta, ina dtugtar le fios an post atá ag gach duine acu (e.g. Cathaoirleach, Rúnaí, Oifig Caidrimh Phoiblí etc.)

- Liosta d'uirlisí atá i seilbh na heagraíochta (de réir mar is infheidhme)

Más rud é go bhfuil uirlisí i seilbh d'eagraíochta i láthair na huair, ní mór doiciméad a chur isteach ina sonraítear líon agus cineál na n-uirlisí, an bhail atá ar na huirlisí agus an tréimhse saoil measta atá acu.

- Foirm Dhearbhaithe Chomhlánaithe

Deimhnítear leis seo go nglacann an eagraíocht leis na coinníollacha ar fad a bhaineann leis an dámhachtain, agus go bhfeidhmíonn sí de réir dea-chleachtais maidir le doiciméid agus nósanna imeachta rialachais na heagraíochta. Ba cheart an Fhoirm Dhearbhaithe seo a íoslódáil ó láithreán gréasáin Music Network ([www.musicnetwork.ie](http://www.musicnetwork.ie)) agus a chomhlánú ina hiomláine sula ndéanfaí í a uaslódáil.

- Beathaisnéisí pearsanra ealaíne

Curriculum Vitae nó faisnéis eile lena dtugtar sonraí ar ghairm cheoil an phearsanra is mó a bhfuil baint acu le gníomhaíochtaí teagasc / ealaíne na heagraíochta. D'fhéadfadh a leanas a bheith i measc an phríomhphearsanra ealaíne, gan a bheith teoranta dóibh: stiúrthóir ealaíne, stiúrthóir ceoil agus/nó stiúrthóir cúnta, teagascóirí/cumadóirí/ceoltóirí ar cuairt a chuireann teagasc ar fáil, etc.

- Taifeadtaí fuaime/físe

Ní mór d'iarratasóirí suas le trí thaifeadadh de ghníomhaíochtaí ealaíonta na heagraíochta, mar aon le doiciméad Word ina liostaítear sonraí na dtaifeadtaí (ceoltóirí, amanna tosaithe/stoptha na míreanna ábhartha le héisteach leo, dátaí agus áit na dtaifeadtaí) a chur ar aghaidh.

- Is féidir taifeadtaí fuaime i bhformáid mp3 a uaslódáil go díreach chuig an bhfoirm iarratais
- Is féidir taifeadtaí fuaime i bhformáidí eile agus taifeadtaí físe a nascadh ar an doiciméad Word.

N.B. Mura mbeifear ábalta rochtain a fháil ar na naisc le linn na tréimhse measúnaithe, ní bheifear in ann d'iarratas a mheas ina iomláine, mar sin déan cinnte go bhfuil do naisc/chomhaid inrochtana go poiblí nó cuir pasfhocal ar fáil más gá.

- An líon éigeantach meastachán do gach uirlis atá beartaithe lena ceannach

Ní mór do gach iarratas ar na Scéime Caipitil Ceoil 2022- Dámhachtain 1 [Treoirínte um Sholáthar Poiblí](#) a chomhlíonadh. Tá meastacháin riachtanach chun críocha comparáide ionas gur féidir 'luach ar airgead' a léiriú agus é a mheá go cúramach i ndáil le gach iarratas. Ní mór meastacháin do gach uirlis atá beartaithe lena ceannach a bheith san áireamh i ngach iarratas, mar seo a leanas:

- Sa chás go bhfuil costas foriomlán na n-uirlisí atá beartaithe lena gceannach faoi bhun €5,000, ní mór d'iarratasóirí meastacháin a chur isteach ó **dhá (2) sholáthróir éagsúla**
- Sa chás go bhfuil costas foriomlán na n-uirlisí atá beartaithe lena gceannach idir €5,000 agus €25,000, ní mór d'iarratasóirí meastacháin a chur isteach ó **thrí (3) sholáthróir éagsúla**

Ná gabhadh costas foriomlán na n-uirlisí atá beartaithe lena gceannach thar €25,000. Ní mór go léireofar ainm an tsoláthóra, sonraíochtaí agus costas na huirlise sa mheastachán i ngabháil scáileáin tógtha ó láithreán gréasáin an tsoláthóra, nó i ríomhphost/litir ón soláthróir. Ó tharla gur féidir le naisc dul in éag/a bheith neamhghníomhach tar éis tamaill, níl sé inghlactha chun naisc a chur ar aghaidh in áit meastacháin san fhormáid a shonraítear anseo. I gcás uirlisí saincheaptha, ba cheart go mbainfeadh na meastachán/meastacháin bhreise leis an uirlis/na huirlisí is mó atá inchomparáide. Más in airgeadra seachas an Euro atá na meastacháin, cuir isteach an ráta comhshó cuí; ní mór figiúirí ar d'fhoirm iarratais a chur síos in Euro.

### 3. **Ábhair Tacaíochta Roghnacha**

Féadfaidh iarratasóirí suas le deich ndoiciméad a uaslódáil mar Ábhar Tacaíochta Roghnach. D'fhéadfadh a leanas a bheith i gceist leis seo, gan a bheith teoranta dóibh: ábhar poiblíochta, gearrthóga nuachtáin; léirmheasanna, bileoga moltóireachta; deimhniú ar mhaoiniú comhpháirtíochta (má tá sé deimhnithe cheana féin).

#### 4. An bealach le d'iarratas a chur ar aghaidh

Ba cheart d'iarratasóirí dul chuig [www.musicnetwork.ie](http://www.musicnetwork.ie), a bpróifíl a shocrú agus Foirm Dhearbhaithe Dhámhachtain 1 a íoslódáil. Ansin, beidh an t-iarratasóir ábalta an t-iarratas a chur i gcrích i gcéimeanna (an fhoirm iarratais a chomhlánú agus na hábhair Tacaíochta Riachtanacha agus Roghnacha ar fad a uaslódáil) le linn na tréimhse iarratais. Ní mór ábhair uile an iarratais, i.e. an fhoirm iarratais agus ábhair tacaíochta, a chur ar aghaidh trí thairseach na n-iarratas atá ar fáil ar [www.musicnetwork.ie](http://www.musicnetwork.ie). Ní mór an t-iarratas comhlánaithe a chur ar aghaidh faoin **2pm, Dé Máirt an 28 Feabhra 2023**.

Má chuireann tú d'iarratas ar aghaidh roimh an dáta deiridh a nglacfar le hiarratais, gheobhaidh tú ríomhphost uathoibríthe ina ndeimhneofar gur éirigh leat d'iarratas a chur isteach sa chóras i gceart. N.B. Mar go seoltar ríomhphost go huathoibríoch, tá seans go dtiocfaidh siad isteach i d'fhillteán turscair. **Mura bhfaigheann tú an ríomhphost seo, níor cuireadh d'iarratas isteach i gceart.** Tabhair ar aird gur faoin iarratasóir atá sé a chinntiú go bhfaigheann Music Network an t-iarratas faoin dáta deiridh a nglacfar le hiarratais. Ní féidir le Music Network freagracht a ghlacadh as iarratais nár cuireadh isteach i gceart faoin dáta deiridh a nglacfar le hiarratais.

#### Comhairle d'iarratasóirí

- Léigh na Treoirínte maidir le Scéim Caipitil Ceoil 2022 - Dámhachtain 1 agus an fhoirm iarratais do Scéim Caipitil Ceoil 2022 - Dámhachtain 1 fad atá d'iarratas á ullmhú agat.
- Soiléirigh na riachtanais atá ag d'eagraíocht ó thaobh uirlisí de agus déan taighde ar na roghanna ceannaigh is oiriúnaí.
- Bíodh tuairim shoiléir réalaíoch agat ar na costais a bhaineann le do thogra agus leag amach go soiléir na foinsí ioncaim atá agat.
- Déan cinnte go bhfuil d'iarratas soiléir agus gonta agus nach bhfuil débhrí ann; ná glac leis go bhfuil cur amach ag na measúnóirí ar do chuid oibre.
- Bí ag smaoineamh ar na critéir roghnúcháin agus an t-iarratas á scríobh agat agus na hábhair tacaíochta á roghnú agat lena gcur ar aghaidh.
- Roghnaigh an t-ábhar tacaíochta go cúramach lena chinntiú gurb é an léiriú is fearr é ar do chuid oibre. Obair a rinneadh le déanaí, go príomha, a bheidh san ábhar tacaíochta, agus ba cheart baint shoiléir a bheith le feiceáil idir é agus na huirlisí atá beartaithe lena gceannach.
- Iarr ar chara nó ar chomhghleacaí súil a chaitheamh ar d'iarratas sula gcuirfeá ar aghaidh é.
- Bíodh d'iarratas ullmhaithe agus curtha ar aghaidh agat i bhfad roimh an dáta agus am deiridh a nglacfar le hiarratais: **2pm, Dé Máirt an 28 Feabhra 2023**.

#### An Nós Imeachta um Measúnú

Déanfaidh comhairleoir neamhspleách na hiarratais incháilithe ar fad a mheas bunaithe ar an gcritéir roghnúcháin a luaitear thíos. D'fhéadfaí leas a bhaint as próiseas gearrliostaithe, ag brath ar líon na n-iarratas. I ndiaidh sin, déanfaidh painéal, ar a mbeidh ionadaithe ó Music Network, ón gComhairle Ealaíon agus cleachtóirí ceoil a bhaineann le seánraí éagsúla, na hiarratais a bhreithniú agus déanfaidh siad cinneadh maidir le leithdháileadh na gcistí. D'fhéadfadh an painéal a chinneadh gan cistí a bhronnadh sa chás nach bhfaighfí dóthain iarratas ardchaighdeáin. Cinneadh críochnaitheach a bheidh i gcinneadh an phainéil. Ba chóir d'iarratasóirí a thabhairt ar aird go bhfuil teorainn leis an maoiniú agus gur próiseas thar a bheith iomaíoch é seo. Ní leor na critéir incháilitheachta a shásamh le maoiniú a chinntiú.

**Critéir Roghnúcháin**

Déanfar iarratais a mheas bunaithe ar na hocht critéar seo a leanas a bhfuil **an t-ualú céanna leo ar fad**:

Cuntas teiste na heagraíochta	Pleananna & polasaithe ealaíne foriomlána na heagraíochta
An gá léirithe atá leis na huirlisí atá beartaithe lena gceannach	Pleananna i ndáil le teagasc / tacaíocht leanúnach a thabhairt dóibhsean a bheidh ag baint leas as na huirlisí atá beartaithe lena
Oiriúnacht na huirlisí atá beartaithe lena gceannach	Leibhéal úsáide na n-uirlisí atá beartaithe lena gceannach
An buntáiste don phobal a bhaineann leis na huirlisí atá beartaithe lena gceannach	Pleananna maidir leis na huirlisí atá beartaithe lena gceannach a chothabháil, a dheisiú, a choinneáil & a árachú

**Torthaí**

Cuirfear gach iarratasóir ar an eolas ar ríomhphost maidir le cinneadh an phainéil faoi i mí Bealtaine 2023. Foilseofar ainmneacha na n-iarratasóirí a n-éireoidh leo go gairid ina dhiaidh sin.

**Iarratasóirí nach n-éireoidh leo**

Cuirfidh Music Network aiseolas ar fáil d'iarratasóirí nach n-éireoidh leo laistigh de dhá mhí ó fhógra na dtorthaí. Beidh cead ag na hiarratasóirí sin iarratas a dhéanamh arís amach anseo.

**Iarratasóirí a n-éireoidh leo - Coinníollacha na dámhachtana**

- Ní mór d'eagraíochtaí a bheith lonnaithe i bPoblacht na hÉireann agus leas rialta a bhaint as na huirlisí inti.
- Ní mór na huirlisí a bheith faoi úinéireacht eagraíocht chomhdhéanaimh a fheidhmíonn ina heagraíocht sheachbhrabúsach, ina heagraíocht dheonach nó ina chomhlacht carthanachta. Ní mór don eagraíocht a cuntas bainc féin a bheith aici (i.e. cuntas neamhphearsanta). Sa chás gur brainse/ball d'eagraíocht náisiúnta é an eagraíocht is iarratasóir, ní mór é sin a shonrú in ainm an iarratasóra (e.g. *"Ainm na heagraíochta náisiúnta - ainm an bhrainse/an bhail"*) agus ba cheart gach faisnéis a chuirtear ar aghaidh a bheith bainteach leis an mbrainse/ball sin den eagraíocht.
- Bronnfar suas le 75% de chostas iomlán na n-uirlisí; ná gabhadh méid na dámhachtana thar 75% de chostas iomlán na n-uirlisí. Ní mór d'iarratasóirí an bealach a mhaoineoidh an eagraíocht an 25% eile a léiriú; níl cead lascaire ó sholáthróirí uirlisí a bheith san áireamh leis an 25% seo. Níor cheart an méid a iarrfar a bheith níos airde ná €18,750 agus níor cheart costas iomlán na n-uirlise a bheith níos airde ná €25,000.
- Tá de cheanglas ar eagraíochta a chuireann cláir ar fáil do leanaí agus do dhaoine óga faoi bhun 18 mbliana d'aois agus/nó d'aoisigh leochaileacha polasaithe agus nósanna imeachta leordhóthanacha maidir le cosaint agus leas leanaí / aosach leochaileach a bheith i bhfeidhm acu.
- Ní mór d'eagraíochtaí polasaí soiléir a bheith i bhfeidhm acu maidir le húsáid na n-uirlisí atá beartaithe lena gceannach, lena n-áirítear soláthar cuí a dhéanamh chun aire a thabhairt d'uirlisí agus chun iad a choinneáil, a árachú, a chothabháil agus a dheisiú, agus a chinntiú go gcuirfear oiliúint agus tacaíocht leanúnach ar fáil do na ceoltóirí a bheidh ag baint úsáid as na huirlisí. Áirítear air seo teagasc/cleachtaí ar líne, teagasc/cleachtaí ar an láthair, ceardlanna/máistir-ranganna a chuirfear ar fáil le pearsana atá cáilithe go cuí/a bhfuil taithí cuí acu, ceoltóirí agus teagascóirí ar cuairt agus deiseanna taibhiúcháin, gan a bheith teoranta don mhéid sin. Féadfaidh eagraíochtaí uirlisí a chur ar fáil saor in aisce do cheoltóirí nó ar tháille ainmniúil (chun dul i dtreo chúram agus chothabháil na huirlise). Níl sé ceaptha go ndéanfaidh eagraíochtaí brabús as na huirlisí, agus dá bhrí sin, tá cuideachtaí brabúsacha neamh-incháilithe le hiarratas a dhéanamh.

- I gcás ionaid atá ag déanamh iarratas ar mhaoiniú, ba cheart dóibh a chur in iúl an mbeidh roinnt buíonta / grúpaí éagsúla ag baint úsáide as na huirlisí atá beartaithe lena gceannach, agus beathaisnéisí pearsanra ealaíne agus samplaí d'obair na ngrúpaí seo ar fad a chur ar aghaidh. Ní mór an duine nó an grúpaí ar a dtitfidh freagracht dheiridh na n-uirlisí a chur in iúl go soiléir san iarratas.
- Ní mór d'eagraíochtaí a mbronnfar dámhachtain orthu beirt chomhaltaí a ainmniú chun maoirseacht a dhéanamh ar bhainistiú dhámhachtain na Scéime Caipitil Ceoil agus ceannach na n-uirlisí, agus ar an gcaoi a ndéanfar coinníollacha an iarratais/na dámhachtana a chomhlíonadh san eagraíocht. Ní rachaidh Music Network i dteagmháil le comhalta ar bith eile den eagraíocht i ndáil le hiarratas na dámhachtana seo mura molfadh an bord/an coiste athrú, ar athrú é a chuirfí in iúl do Music Network i scríbhinn.
- Scríobhfaidh eagraíochta ar a mbronnfar dámhachtain chuig Music Network laistigh de dhá sheachtain ó na torthaí a fháil chun íocaíocht na dámhachtana a iarraidh. Maidir le dámhachtainí €10,000 nó os a chionn sin, éileofar ar iarratasóirí a n-éireoidh leo an Uimhir Tagartha Cánach agus an Uimhir Rochtana an Imréitigh Cánach atá acu a chur ar fáil d'fhonn an dámhachtain a tharraingt anuas.
- Ní mór don eagraíocht ar a mbronnfar dámhachtain faomhadh Music Network a fháil maidir le hathrú ar bith atá beartaithe aici ar na huirlisí sonraithe le ceannach.
- Ní mór d'eagraíochtaí cóipeanna d'fháltais don uirlis / do na huirlisí ceadaithe a chur ar fáil do Music Network laistigh de thrí mhí ó íocaíocht na dámhachtana a fháil. I gcás gur in airgeadra eile seachas an euro atá na fáltais, ní mór deimhniú ar an tsuim a íocadh in euro a chur ar fáil freisin. I gcás nach bhfaightear doiciméid den sórt sin, forghéillfeadh an dámhachtaí an dámhachtain, agus aisíocfaidh sé an sciar de na cistí nár úsáideadh le Music Network. I gcás an costas deiridh a bheith níos ísle ná mar a raibh súil leis, aisíocfaidh an dámhachtaí an sciar den dámhachtain nár úsáideadh le Music Network lena chur isteach i gciste dhámhachtain na Scéime Caipitil Ceoil do na blianta atá le teacht.
- Níl cead ag eagraíochtaí ar a mbronnfar dámhachtain uirlisí a mhaoineofar faoin scéim seo a dhíol ná a dhiúscairt ar bhealach eile. Má tharlaíonn sé nach bhfuil gá leis na huirlisí a thuilleadh, nó má thagann deireadh leis an eagraíocht, ní mór Music Network a chur ar an eolas. Tar éis di dul i gcomhairle le Music Network, aistreoidh an eagraíocht na huirlisí chuig comhlacht cuí eile (le húsáid leanúnach na huirlisí a chinntiú), nó déanfaidh sí na huirlisí a dhíol agus an sciar iomchuí de na cistí a bailíodh a aisíoc le Music Network. Cuirfear an méid sin isteach i gciste na Scéime Caipitil Ceoil do na blianta atá le teacht.
- Cuirfidh eagraíochtaí ar a mbronnfar dámhachtain tuarascálacha bliantúla ar úsáid bheacht na n-uirlisí ar fáil do Music Network go ceann trí bliana ó dháta na dámhachtana.
- Beidh sé d'oibleagáid ar eagraíochtaí ar a mbronnfar dámhachtain tacaíocht Music Network, tacaíocht na Roinne Turasóireachta, Cultúir, Ealaíon, Gaeltachta, Spóirt agus Meán agus tacaíocht na Comhairle Ealaíon a admháil in ábhar beathaisnéiseach agus poiblíochta, ó dháta na dámhachtana, go ceann trí bliana ar a laghad. Seolfar na lógónna ábhartha agus teimpléad de théacs na hadmhála chuig dámhachtaithe tar éis torthaí na dámhachtana a dheimhniú. Éileofar ar eagraíochtaí cruthúnas ar admháil a chur faoi bhráid Music Network in éineacht le tuarascálacha bliantúla i.e. cláir ceolchoirme shamplacha, gabhálacha scáileáin ó láithreáin ghréasáin, póstaer, fógraín etc. ar a bhfuil an admháil le feiceáil.
- Comhaontóidh eagraíochtaí ar a mbronnfar dámhachtain go gcloifidh siad le coinníollacha na dámhachtana. Sa chás go sáraíonn eagraíocht coinníollacha na dámhachtana, aisíocfaidh sí le Music Network an tsuim a bronnadh uirthi (nó an céatadán de luach na n-uirlisí ag an bpointe sin atá comhfheagrach don chéatadán de luach na bundámhachtana). Cuirfear an méid sin isteach i gciste na Scéime Caipitil Ceoil do na blianta atá le teacht. Ní bheidh an eagraíocht incháilithe le hiarratas a dhéanamh ar an Scéim Caipitil Ceoil amach anseo.